



Quarta Lingua 2017

Nus avain cumenzà l'onn da rapport cun la radunanza generala. Ella ha gì lieu ils 15 da mars 2017 a Turitg – senza dr. Linus Bühler ch'è stà blers onns actuar da la Quarta Lingua (QL) e ch'è mort mez schaner 2017. En il rom da las elecziuns da renovaziun èn Ivana Cabalzar e Bettina Vital vegnidas elegidas da nov en la suprastanza e Petra Camathias ha surpiglià il presidi sco successura da Bettina Berther Desax e Kaspar Silberschmidt.

Suenter la part statutara ha l'autura Ludivina Candinas-Collenberg, che vegn sustegnida da la QL, prelegi da ses cudesch «Gloria e tschugalata». Sia figlia Jacinta Candinas, che ha illustrà il cudesch, ha accumulà ella. Per il divertiment musical ha procurà Ursina Giger che la QL ha era gia sustegnì.

Tenor sia incumbensa da promoziun statutara ha la QL approvà durant l'onn da rapport las suandantas dumondas da sustegn e las ha sustegnì cun totalmain CHF 14'000.– :

- Sabrina Bundi e Michel Decurtins, comic online «Crestomat» rum/tud/tal/engl: CHF 1'500
- Gion Battista Spescha, publicaziun dal cudesch «Adina puspei – Immer wieder» rum/tud CHF 1'000
- Walter Rosselli, publicaziun dal cudesch «Our d'la rüzcha dal minchadi – ... » rum/tal/franz: CHF 500
- Edizioni sottoscala, translaziun taliana da «Settembrini» da Leo Tuor: CHF 1'000
- Paula Casutt-Vincenz, publicaziun dal cudesch «Der Wandel der Zeit – L'umbriva dil temps» tud/rum, contribuziun als custs da lectorat: CHF 1'000
- R-tunes, produciun dal DC «Umbrivas» dad Astrid Alexandre rum/franz/engl: CHF 1'000
- Corina Gustin, plattafurma online rumantscha «latabla.ch»: CHF 1'000
- editionmevinapuorger, reediziun da las novellas da Selina Chönz «La chastlauna ed oters raquints»: CHF 1'000
- Chasa Editura Rumantscha, Reihe Ord Chadaina: «barbacor/Herzkater» 1. publicaziun da Chatrina Josty
- Edizioni Casagrande, translaziun taliana dal roman «Tamangur» da Leta Semadeni: CHF 1'000
- Uniun per la litteratura rumantscha ULR, 27avels Dis da litteratura a Domat: CHF 2'000
- Bagat, toc da teater «Gaglina Ida e Stgilat Pilat»: CHF 2'000

L'onn da rapport han ca. 10-12 uffants da 5 fin 10 onns frequentà il curs da rumantsch a Turitg, inizià da la QL ed organisà ensemen cun la Lia Rumantscha (LR). La contribuziun iniciala concedida il 2014 dal fond da lottaria dal chantun da Turitg è stada duvrada si la fin dal terz onn da curs (2016/2017). Per cuntinuar il curs ston ins chattar in nov sponsur.

La suprastanza è sa scuntrada durant l'onn da rapport per trais sesidas ordinarias (6 d'avrigl, 14 da settember e 23 da november). A las sesidas dal Cussegl da la LR a Cuir n'ha nagin pudì prender part persunalmain. La posiziun da la QL han ins mintgamai communitgà anticipadamain per e-mail. A la radunanza da delegads da la LR ils 28 d'october a Lantsch n'è la QL betg stada represchentada – ella è sa perstgisada. Ils 21 da november han ils presidents da la QL, la LR, la Pro Svizra Rumantscha, la Giuventetgna Rumantscha, l'Uniun per la litteratura rumantscha e l'Uniun da las Rumantschas e dals Rumantschs en la Bassa inizià ensemen cun la Pro Grigioni Italiano ina manifestaziun cunter l'iniziativa No Billag che ha gì lieu il 1. da favrer 2018 a la staziun principala da Turitg.

Ils 31 da december, l'ultim di da l'onn da rapport 2017, è la nova pagina-web da la QL – ussa bilingua rumantsch/tudestg – ida online. La pagina favuraivla per ils utilisaders è era cumpatibla cun smartphones. Ina da las novaziuns è ultra da la pussaivladad da sa registrar online sco commember da la QL er in spurtegl digital per inoltrar dumondas da sustegn. Quai facilitescha a la suprastanza il tractament da las dumondas.

La fin dal 2017 ha la QL 305 commembers (fauturs). La pagina da Facebook da noss'uniun dumbra entant 475 fans.

Suprastanza

Presidenta	Petra Camathias Bettina Berther Ivana Cabalzar Barbara Cuffaro Nathalie Killias Kaspar Silberschmidt Bettina Vital Ivo Zen
------------	-------------------------------------------------------------------------------------------------------------------------------------------------